

摘藻堂四庫全書薈要

經部

欽定四庫全書薈要

經部

經禮補逸卷八至

詳校官編修臣程嘉謨



欽定四庫全書叢要卷二千四十二

經部

經禮補逸卷六

元 汪克寬 撰

凶禮

凶荒禮

刑司徒以荒政十有二聚萬民一曰散利二曰薄征三

曰緩刑四曰弛力五曰舍禁六曰去幾七曰普禮八曰

殺哀九曰蕃樂十曰多昏十有一曰索鬼神十有二曰

除盜賊士師若邦凶荒則以荒辨之法治之令移民通

財糾守緩刑朝士若邦凶荒則令邦國都家縣鄙慮刑  
貶遣人掌縣都之委積以待凶荒小宰以法掌朝覲會  
同賓客之戒具喪荒亦如之令百官府共其財用喪荒  
受其含襚幣玉之事膳夫大荒則不舉司服大荒素服  
大司樂大荒令弛縣典瑞珍圭以恤凶荒小行人若國  
凶荒則令調委之廩人掌九穀之數若食不能人二鬴  
則令邦移民就穀詔王殺邦用掌客凡禮賓客凶荒殺  
禮司市國凶荒則市無征凡以神仕者以禴國之凶荒



曲禮歲凶年穀不登君膳不祭肺馬不食穀馳道不除  
祭事不縣大夫不食梁士飲酒不樂玉藻年不順成君  
衣布摺本闕梁不祖山澤列而不賦土工不興大夫不  
得造車馬春秋傳襄公二十四年大祲之禮君食不兼  
味臺榭不塗弛侯廷道不除百官布而不制鬼神禱而  
不祀此大祲之禮也王制祭凶年不儉

愚按祭禮豐年不奢凶年不儉此記禮者之言也孔  
子又曰凶年祀以下牲不同何哉蓋先王之祀制用

有常不以歲之豐凶而易其禮此禮之循乎經也祀  
以下牲如凶年君膳則不舉服則布素樂則弛縣賓  
客則殺禮而以常祭之牲遞降而用者此又禮之通  
乎變也然歲有豐凶而禮無奢儉牲有降用而禮無  
貶損是則未嘗不同也

大札禮

大司徒大札則令邦國移民通財舍禁弛力薄征緩刑  
朝士若札喪則令邦國都家縣鄙慮刑貶膳夫大札則

不舉司服大札素服大司樂大札令弛縣司市國札喪則市無征掌客凡禮賓客札喪叔禮凡以神仕者以禴民之札喪小行人若國札喪則令賻補之均人凶札則無力政無財賦

告饑禮

春秋左傳隱公六年京師來告饑

請糴禮

春秋左傳隱公六年京師來告饑公為之請糴於宋衛

齊鄭禮也莊公二十八年臧孫辰告糴于齊僖公十三年晉荐饑使乞糴于秦秦輸粟于晉

歸粟禮

春秋僖公十三年晉荐饑乞糴于秦秦輸粟于晉十五年晉又饑秦又餽之粟定公五年夏歸粟于蔡以周亟  
矜無資

大災禮

膳夫大災則不舉司服大災素服大司樂大災令弛縣

掌客凡禮賓客禍災殺禮小宗伯大災及執事禱祠于  
上下神祇司巫國有大災則帥巫而造巫恒女巫凡邦  
之大災歌哭而請春秋左傳襄公九年宋災二師令四  
鄉正敬饗祝宗用馬于四墉祀盤庚于西門之外昭公  
十八年五月壬午宋衛陳鄭皆大災作鄭子產辭晉公  
子公孫于東門使司寇出新客禁舊客勿出於宮使子  
寬子上巡羣屏攝至于大宮使公孫登徙大龜使祝史  
徙主祔於周廟告于先君使府人庫人各徹其事商成

公倣司宮出舊宮人寘諸火所不及司馬司寇列居火道行火所燬城下之人伍列登城明日使野司寇各保其徵郊人助祝史除於國北禳火于玄冥回祿祈于四墉書焚室而寬其征與之材三日哭國不市使行人告於諸侯宋衛皆如是哀公三年五月辛卯司鐸火火踰公宮桓僖災救火者皆曰顧府南宮敬叔至命周人出御書俟於宮曰庀汝而不在死子服景伯至命宰人出禮書以待命命不共有常刑校人乘馬巾車脂轄百官

官備府庫慎守宮人肅給濟濡帷幕鬱攸從之蒙茸公  
屋自大廟始外內以悛助所不給有不用命則有常刑  
無赦公父文伯至命校人駕乘車季桓子至御公立于  
象魏之外命救火者傷人則止穀梁傳成公五年梁山  
崩壅河三日不流晉召伯尊伯尊曰君親素縞帥羣臣  
而哭之既而祠焉斯流矣左傳山崩川竭君為之不舉  
降服乘縵徹樂出次祝幣史辭而禮焉

弔裁禮

小行人若國有裁則令哀弔之春秋左傳宋大水公使弔焉曰天作淫雨害於棗盛若之何不弔對曰孤實不敬天降之災又以為君憂拜命之辱莊公十一年宋大災襄公三十年宋災叔孫豹會晉趙武齊公孫蠆宋向戌衛北宮佗鄭罕虎及小邾之大夫會于澶淵為宋災故以謀歸宋昭十八年許不弔災君子知許之先亡也雜記廐焚孔子拜鄉人為火來者拜之士壹大夫再亦相弔之道也



# 致禮

大宗伯以禴禮哀圍敗大行人致禮以補諸侯之災小行人若國師役則令槁禮之春秋左傳昭公六年叔弓如楚聘且弔敗也哀公十五年楚子西子期伐吳陳侯使公孫貞子弔焉吳子使太宰嚭勞哀公二十年越圍吳趙孟降於喪食使楚隆告於吳王曰寡君之老無恤使陪臣隆敢展謝其不共黃池之役君之先臣志父得承齊盟曰好惡同之今君在難無恤不敢憚勞非晉國

之所能及也使陪臣敢展布之王拜稽首曰寡人不佞  
不能事越以為大夫憂拜命之辱與之一簞珠使問趙  
孟曰句踐將生憂寡人寡人死之不得矣王曰溺人必  
笑吾將有問也史黯何以得為君子對曰黯也進不見  
惡退無謗言王曰宜哉僖公三十三年公如齊朝且弔  
有狄師也

恤禮

大宗伯以恤禮哀寇亂春秋左傳昭公二十一年宋華

亥向寧華定自陳入于宋南里以叛二十二年遂越使  
告于宋曰寡君聞君有不令之臣為君憂無寧以為宗  
羞寡君請受而戮之對曰孤不佞不能媚其父兄以為  
君憂拜命之辱襄公十四年衛獻公使子蟠子伯子皮  
與孫子盟于丘宮孫子皆殺之公如鄆使子行於孫子  
孫子又殺之公出奔齊孫氏追之敗公徒於阿澤公使  
厚成叔弔于衛曰寡君使瘠聞君不撫社稷而越在竟  
若之何不弔以同盟之故使瘠敢私于執事曰有君不

弔有臣不敏君不赦宥臣亦不帥職增淫發洩其若之  
何衛人使太叔儀對曰羣臣不佞得罪於寡君寡君不  
以即刑而悼弁之以為君憂君不忘先君之好辱弔羣  
臣又重恤之敢拜君命之辱重拜大貺

唁禮

詩載馳歸唁衛侯春秋穀梁傳弔失國曰唁公羊傳弔  
亡國曰唁弔失國曰弔昭公二十五年公孫于齊次于  
陽州齊侯唁公于野井二十九年公至自乾侯居于鄆

齊侯使高張來唁公三十一年晉侯使荀躒唁公于乾侯公羊傳昭公二十五年公孫于齊齊侯唁公于野井曰奈何君去魯國之社稷昭公曰喪人不佞失守魯國之社稷執事以羞再拜顙高子執簞食與四脰脯國子執壺漿曰吾寡君聞君在外餒饗未就敢致糗於從者昭公曰君不忘吾先君延及喪人錫之以大禮載拜稽首以衽受高子曰有夫不祥君無所辱大禮昭公蓋祭而不嘗景公曰寡人有不腆先君之服未之敢服有不

腆先君之器未之敢用敢以請昭公曰喪人不佞失守  
魯國之社稷執事以羞敢辱大禮敢辭景公曰寡人有  
不腆先君之服未之敢服有不腆先君之器未之敢用  
敢固以請昭公曰以吾宗廟之在魯也有先君之服未  
之能以服有先君之器未之能以出敢固辭景公曰寡  
人有不腆先君之服未之敢服有不腆先君之器未之  
敢用請以饗乎從者昭公曰喪人其何稱景公曰孰君  
而無稱昭公於是噉然而哭諸大夫皆哭既哭以遇禮

相見孔子曰其禮與其辭足觀矣

經禮補逸卷六



欽定四庫全書薈要卷二千四十三

經部

經禮補逸卷七

元 汪克寬 撰

軍禮

振旅禮

書大禹謨禹班師振旅周禮大司馬中春敎振旅司馬以旗致民平列陳如戰之陳辨鼓鐸鐃之用王執路鼓諸侯執賁鼓軍將執晉鼓師帥執提旅帥執鼙卒長執鐃兩司馬執鐸公司馬執蠲以敎坐作進退疾徐䟽

數之節大宰作大事則戒于百官贊王命

謂助王爲教令案春秋傳

國之大事在祀與戎

小宰以法掌祭祀朝覲會同賓客之戒具軍

旅田役喪荒亦如之令百官府共其財用治其施舍聽

其治訟大司馬若大師則掌其戒令涖太卜帥執事涖

釁主及軍器司戈盾軍旅授貳車戈盾建乘車之戈盾

授旅賁及虎士戈盾司弓矢凡師役頒弓弩授兵甲之

儀司常凡軍事建旌旗大司徒大軍役以旗致萬民而

治其徒庶之政令大僕凡軍旅贊王鼓鼓人以鼗鼓鼓

軍事凡軍旅夜鼓鑿軍動則鼓其衆巾車掌王之五路  
草路龍勒條纓五就建太白以即戎車僕掌戎路之萃  
廣車之萃闕車之萃萃車之萃輕車之萃凡師共草車  
各以其萃典路凡軍旅以路從銜枚氏軍旅令銜枚禁  
詔呼歎鳴於國中者大師執同律以聽軍聲而詔吉凶  
幕人軍旅共其帷幕幄帟纓掌次師田則張幕設重帟  
重案廩人凡師役之事則治其糧與其食封人軍旅則  
飾其牛牲外饗師役則掌共其獻賜脯肉之事委人軍

旅共其委積薪芻遺人凡師役掌其道路之委積小子  
凡師田斬牲以左右徇陳牛人軍事共其犒牛凡軍旅  
行役共其兵車之牛小行人若國師役則令犒櫓之縣  
師若將有軍旅田役之戒則受法于司馬以作其衆庶  
及馬牛車輦會其車人之卒伍使皆備旗鼓兵器以帥  
而至大司寇凡大軍旅泣戮于社士師大師帥其屬而  
禁逆軍旅者與犯師禁者而戮之鄉士大軍旅則各掌  
其鄉之禁令帥其屬夾道而蹕

芟舍禮

大司馬中夏教芟舍如振旅之陳羣吏撰車徒讀書契  
辨號名之用帥以門名縣鄙各以其名家以號名鄉以  
州名野以邑名百官各象其事以辨軍之夜事其他皆  
如振旅

治兵禮

大司馬中秋教治兵如振旅之陳辨旗物之用王載大  
常諸侯載旂軍吏載旗師都載旛鄉遂載物郊野載旐

百官載旗各書其事與其號焉其他皆如振旅

### 大閱禮

大司馬中冬教大閱前期羣吏戒衆庶修戰法虞人萊所田之野爲表百步則一爲三表又五十步爲一表田之日司馬建旗于後表之中羣吏以旗物鼓鐸鐃各帥其民而致質明弊旗誅後至者乃陳車徒如戰之陳皆坐羣吏聽誓于陳前斬牲以左右徇陳曰不用命者斬之中軍以鞀令鼓鼓人皆三鼓司馬振鐸羣吏作旗

車徒皆作鼓行鳴鐻車徒皆行及表乃止三鼓撫鐸羣  
吏幣旗車徒皆坐又三鼓振鐸作旗車徒皆作鼓進鳴  
鐻車驟徒趨及表乃止坐作如初乃鼓車馳徒走及表  
乃止鼓戒三闕車三發徒三刺乃鼓退鳴鐸且卻及表  
乃止坐作如初司常掌九旗之物名各有屬以待國事  
日月爲常交龍爲旂通帛爲旛雜帛爲物熊虎爲旗鳥  
隼爲旟龜蛇爲旐全羽爲旟析羽爲旌及國之大閱贊  
司馬頒旗物王建大常諸侯建旂孤卿建旛大夫士建

物師都建旗州里建旗縣鄙建旄道車載旛旂車載旌  
皆畫其象焉春秋桓公六年秋八月壬午大閱

愚案周禮先王寓軍政於四時之田不廢武備中春  
教振旅以教坐作進退疾徐䟽數之節中夏教茷舍  
以辨號名之用中秋教治兵以辨旗物之用其他皆  
如振旅然其法略於三時而致備於中冬者爲農隙  
也故於是時簡車徒精器物屬旗鼓以教衆庶修戰  
法斬牲徇陳而訓誓之使耳目之衆莫不一心驟趨



之節無有異習誅一庸慢甄一用命改易視聽以作  
其勇敢之氣而民趨勞如趨逸者蓋以其令之素教  
之善也今桓公乃大閱於煩暑之月不惟妨民失政  
之非而妄爲僭禮之舉是豈事上臨下之道先王教  
民之意哉故春秋特書之以垂戒焉耳

蒐田禮

大司馬中春教振旅遂以蒐田有司表貉誓民鼓遂圍  
禁火弊獻禽以祭社大司徒大田役以旗致萬民而治

其徒庶之政令縣正若將用野民師田行役移執事則帥而致治其政令既役則稽功會事而誅賞鄉師凡四時之田前期出田法于州里簡其鼓鐸旗物兵器修其卒伍及期以司徒之大旗致衆庶而陳之以旗物辨鄉邑而治其政令刑禁巡其前後之屯而戮其犯命者斷其爭禽之訟稍人若有師田行役之事則以縣師之法作其同徒輦輦帥而至治其政令以聽於司馬小宗伯若大田則帥有司而饁獸于郊遂頒禽肆師凡四時之

大甸獵祭表貉則爲位遂師軍旅田獵平野民掌其禁  
令比敘其事而賞罰遂人師田作野民帥而至掌其政  
治禁令甸祝掌四時之田表貉之祝號禴牲掌其祝號  
小宰以法掌朝覲會同賓客之戒具軍旅田役亦如之  
令百官府共其財用治其施舍聽其治訟小子凡師田  
斬牲以左右徇陳巾車掌王之五路木路前樊鵠纓建  
大麾以田田僕掌馭田路以田以鄙掌佐車之政設驅  
逆之車令獲者植旌及獻比禽凡田王提馬而走諸侯

晉大夫馳校人田獵則帥驅逆之車幕人田役共其帷  
幕幄帟綬掌次師田則張幕設重帟重案司几筵凡田  
役則設熊席右漆几司常凡軍事建旌旗田亦如之大  
僕凡軍旅田役贊王鼓鼓人軍動則鼓其衆田役亦如  
之司弓矢殺矢鏃矢用諸田獵獸人掌畧田獸辨其名  
物冬獻狼夏獻麋春秋獻獸物時田則守畧及弊田令  
禽注于虞中凡田獸者掌其政令山虞若大田獵則萊  
山田之野及弊田植虞旗于中致禽而珥焉澤虞若大

田獵則萊澤野及弊田植虞旌以屬禽迹人凡田獵者  
受令焉禁麇卯者與其毒矢射者郊特牲季春出火爲  
焚也然後簡其車賦而歷其卒伍而君親誓社以習軍  
旅左之右之坐之起之以觀其習變也而流示之禽而  
鹽諸利以觀其不犯命也

鹽讀爲鹽 歆  
鹽於利也

曲禮國君春田

不圍澤大夫不掩羣士不取麇卯詩吉日既張我弓既  
挾我矢發彼小豸殪此大兕盧令刺荒于田也春秋傳  
魯昭公八年蒐于紅艾蘭以爲防置旃以爲轅門以葛

覆質以爲熱流旁握御輦者不得入車軌塵馬候蹄揜禽旅御者不失其馳然後射者能中過旁弗逐下從奔之道也

愚案艾蘭以爲防以大艾草爲防營也置旃以爲轅門旃旗名謂植旗以爲門轅門是植車以爲門舍其五十步後表之中謂君表也覆纏質樅繫門闌也以毛裘纏質之上以爲門闌也流旁握握四寸謂車與門之廣狹相值差偏以寸則輦挂於繫驅而不得入

矣車軌塵塵不出徹焉候蹄發足疾遲相應也案詩  
傳朱子謂葛作褐即裘纏質流旁握即間容握文義  
相同攷之車之制具見於考工記輪人與人之治御  
之名僅見於保氏五御之目是制莫難於車御莫難  
於人習莫難於戰所謂以不教民戰是謂棄之也此  
故因田車之御以閱軍旅之車習民於變爲戰之備  
所謂教於田獵以習五戎是也夫羣卒伍之衆局熊  
虎之氣三鼓振鐸當車徒驟趨禽獸流崩之時騎射

驅逐之際苟御之不以其道勘失之寸則車挂馬潰  
駭而莫之爲射不及中而犯命之罰及之習之爲易  
乎噫御車節奏之法其難如此則夫御人之道又何  
如哉

苗田禮

大司馬中夏教茆舍遂以苗田如蒐之法車樊獻禽以  
饗初王制天子殺則下大綏諸侯殺則下小綏大夫殺  
則止佐車佐車止則百姓田獵

殺獲也下偃仆之也綏  
旌旗之屬佐車即周禮



逆驅之  
車也

### 獮田禮

大司馬中秋教治兵遂以獮田如蒐田之法羅弊致禽  
以祀祊肆師獮之日涖卜來歲之戒春秋莊公八年春  
甲午治兵月令季秋天子乃教於田獵以習五戎  
夫及矛戈戟  
之五兵也

### 獮田禮

大司馬中冬教大閱遂以獮田以旌爲左右和之門羣

吏各帥其車徒以敘和出左右陳車徒有司平之旗居  
卒間以分地前後有屯百步有司巡其前後險野人爲  
主易野車爲主既陳乃設驅逆之車有司表貉于陳前  
中軍以輦令鼓鼓人皆三鼓羣司馬振鐸車徒皆作遂  
鼓行徒銜枚而進大獸公之小獸私之獲者取左耳及  
所弊鼓皆駢車徒皆譟徒乃弊致禽饁獸于郊入獻禽  
以享烝詩車攻田車既好駕言行狩春秋桓公四年春  
正月公狩于郎

愚案郎非國內之狩故書地譏遠也

類禮

太祝太師類上帝詩皇矣篇是類是禡王制天子將出征類乎上帝

愚案國之大事在祀與戎此爲師祭也師興征伐類于上帝言禮以敬其事也

禡禮

大司馬有司表貉于陳前甸祝掌四時之田表貉之祝

號肆師凡四時之大甸獵祭表貉則爲位王制禡於所  
征之地詩皇矣是類是禡

案禡行師之祭也

宜禮

大祝大師宜于社王制天子將出征宜乎社春秋左傳  
受脤于社

愚案宜出兵祭社之名社所以神地道主陰先王建  
國左祖右社大社左庫門之內右國社亦在公宮之

右皆尚陰也陰主殺故誓社而田因田而習軍旅出征祭之稱其義也然征既宜于社而又類于上帝造于祖禰何哉蓋生殺非王者所得私也類于上帝明奉天討也造于祖禰示受命于廟不敢自專也曰類曰宜曰造祭雖先後不同合周官王制泰誓言之其義各有攸當也

造禮

大祝掌六祈以同鬼神示二曰造大師造于祖王制天

子將出征造乎禰

愚案造造而告之之祭也告于祖禰告以道其事而致其敬也考之王制又曰受命于祖泰誓曰受命于文考此蓋因造告卜於廟受命于祖考而後征也

祭馬祖禮

校人春祭馬祖執駒庾人掌皐馬及祭馬祖詩吉日吉日維戊既伯既禱

案伯馬祖也謂天駟房星之神也禱祀而祈之也

祭先牧禮

校人夏祭先牧頒馬攻特庾人祭閑之先牧

祭馬社禮

校人秋祭馬社臧僕

祭馬步禮

校人冬祭馬步獻馬講馭夫甸祝禘牲禘馬皆掌其祝號

大合軍禮

大司馬及師大合軍以行禁令以救無辜伐有罪

誓師禮

士師以五戒先後刑罰一曰誓用之于軍旅大司徒施  
十有二教八曰以誓教恤則民不怠書大禹謨禹乃會  
羣后誓于師曰濟濟有衆咸聽朕命止其克有勲甘誓  
大戰于甘乃召六卿王曰嗟六事之人予誓告汝止予  
則孥戮汝肅征惟仲康肇位四海肅侯命掌六師義和  
廢厥職酒荒于厥邑肅侯承王命徂征告于衆曰嗟予



有衆<sup>止</sup>其爾衆士懋戒哉湯誓王曰格爾衆庶悉聽朕

言<sup>止</sup>罔有攸赦泰誓惟十有三年春大會于孟津王曰

嗟我友邦冢君越我御事庶士明聽誓<sup>止</sup>時哉不可失

維戊午王次于河朔羣后以師畢會王乃徇師而誓曰

嗚呼<sup>止</sup>惟克永世時厥明王乃大巡六師明誓衆士王

曰嗚呼我西土君子<sup>止</sup>維予小子無良牧誓時甲子昧

爽王朝至于商郊牧野乃誓王左杖黃鉞<sup>止</sup>其于爾躬

有戮

致師禮

環人掌致師大司馬及致建大常比軍衆誅後至者春秋傳宣公十二年楚許伯衛樂伯攝叔爲右以致晉師許伯曰吾聞致師者御靡旌摩壘而還樂伯曰吾聞致師者左射以蔽代御執轡御下兩馬掉鞅而還攝叔曰吾聞致師者右入壘折馘執俘而還皆行其所聞而復

大獻禮

大祝軍歸獻于社則前祝大司馬若師有功則左執律

右秉鉞以先愷樂獻于社大司樂王師大獻則令奏愷  
樂樂師凡軍大獻教愷歌遂倡之眡瞭賓射皆奏其鍾  
鼓愷獻亦如之鑄師軍大獻則鼓其愷樂春秋左傳凡  
諸侯有四夷之功則獻于王王以警于夷中國則否諸  
侯不相遺俘僖公二十八年五月丁未晉侯獻楚俘于  
王駟介百乘徒兵千文公四年甯武子曰諸侯敵王所  
愷而獻其功王於是乎賜之彤弓一彤矢百玃弓矢千  
以覺報宴成公二年晉侯使鞏朔獻齊捷于周王弗見

使單襄公辭焉曰蠻夷戎狄不式王命淫湎毀常王命伐之則有獻捷王親受而勞之所以懲不敬勸有功也兄弟甥舅侵敗王略王命伐之告事而已不獻其功所以敬親暱禁淫慝也今叔父克遂有功於齊而奸先王之禮余雖欲於鞏伯其敢廢舊典以忝叔父夫齊甥舅之國也而大師之後也寧不淫從其欲以怒叔父抑豈不可諫誨士莊伯不能對襄公二十五年鄭伐陳入之子產獻捷于晉戎服將事晉人問陳之罪對曰昔虞閔

父爲周陶正以服事我先王我先王賴其利器用也與其神明之後也庸以元女大姬配胡公而封諸陳以備三恪則我周之自出至于今是賴桓公之亂蔡人欲立其出我先君莊公奉五父而立之蔡人殺之我又與蔡人奉戴厲公至於莊宣皆我之自立夏氏之亂成公播蕩又我之自入君所知也今陳忘周之大德蔑我大惠弃我姻親介恃楚衆以憑陵我敝邑不可億逞我是以有往年之告未獲成命則有我東門之役當陳隧者井

堙木刊敝邑大懼不競而恥大姬天誘其衷啓敝邑心  
陳知其罪授手于我用敢獻功晉人曰何故戎服對曰  
我先君武莊爲平桓鄉士城濮之役文公布命曰各服  
舊職命我文公戎服輔王以授楚捷不敢廢王命故也  
士莊伯不能詰乃受之成公二年鄭皇戎如楚獻捷昭  
公十年季平子伐莒取郟獻俘十七年晉荀吳滅陸渾  
獻俘于文宮

釋奠獻馘禮

大祝及軍歸反行舍奠王制出征執有罪反釋奠于學以訊馘告

愚案訊者問其首惡馘者截其左耳夫執訊獲醜而反舍奠于先聖先師以是告之者蓋始出征受成于學今師還以武功告成于文德之地明不專恃乎威戮而必任之以德禮也昔僖公在類獻馘而國人以文武頌之者亦以此歟

大均禮

大宗伯大均之禮恤衆也大司馬均守平則以安邦國  
大司徒以土均之法辨五物九等制天下之地征以作  
民職以令地貢以斂財賦以均齊天下之政小司徒受  
邦國之比要乃會萬民之卒伍而用之五人爲伍五伍  
爲兩四兩爲卒五卒爲旅五旅爲師五師爲軍以起軍  
旅以作田役以比追胥以令貢賦乃分地域而辨其守  
施其職而平其政土均掌平土地之政以均地守以均  
地事以均地貢均人掌均人民牛馬車輦之力政以歲



上下書康誥昔君文武丕平富

大役禮

大宗伯大役之禮任衆也小司徒大軍旅帥其衆庶小  
軍旅巡役乃均土地以稽其人民而周知其數上地家  
七人可任也者家三人中地家六人可任也者家五人  
下地家五人可任也者家二人凡起徒役毋過家一人  
以其餘爲羨唯田與追胥竭作鄉大夫以歲時登其夫  
家之衆寡辨其可任者國中自七尺以及六十野自六

尺以及六十有五皆征之其舍者國中貴者賢者能者服公事者老者疾者皆舍大司馬凡令賦以地與民制之上地食者參之二其民可用者家三人中地食者半其民可用者二家五人下地食者參之一其民可用者家二人大役與慮事屬其植受其要以待考而賞誅縣士邦有大役聚衆庶則各掌其縣春秋左傳凡土功龍見而畢務戒事也火見而致用水昏正而裁日至而畢

大封禮

大宗伯大封之禮合衆也大司徒辨其邦國都鄙之數  
制其畿疆而溝封之大司馬制畿封國以正邦國形方  
氏掌制邦國之地役而正其封疆無有華離之地司几  
筵凡封國王位設黼依內史凡命諸侯及孤卿大夫則  
冊命之大宗伯王命諸侯則儋大司徒凡建邦國以土  
圭土其地而制其役諸公之地封疆方五百里其食者  
半諸侯之地封疆方四百里其食者參之一諸伯之地  
封疆方三百里其食者參之一諸子之地封疆方二百

里其食者四之一諸男之地封疆方百里其食者四之一凡造都鄙制爲地域而封溝之以其室數制之不易之地家百畝一易之地家二百畝再易之地家三百畝愚案大司徒論公侯伯子男之地各以封疆言而其食者或半或參之一或四之一參諸王制以田言孟子以班祿言蓋皆專主田祿此正周禮所謂食者也大抵周禮所載凡五等通以封疆言兼附庸在其內王制孟子凡三等專以田祿言附庸不在其列此所

以有多寡之殊也嘗考周公之封於魯太公之封於齊孟子所謂侯方百里也然魯頌有曰王曰叔父建爾元子乃命魯公俾侯于東錫之山川土田附庸又曰奄有龜蒙遂荒大東至于海邦淮夷來同此豈魯方百里所能容乎左傳有曰昔召康公命我先君大公夾輔周室賜我先君履東至于海西至于河南至于穆陵北至于無棣此豈齊方百里所能容乎要之周之封爵惟祀宋爲上公齊魯爵皆侯侯之封疆方

四百里其食者參之一食者參之一則封疆百里有  
奇正孟子王制所謂侯方百里魯頌所謂錫之土田  
者也其餘封疆迨三百里正魯頌所謂錫之附庸如  
魯有邾葛顓臾之類是已職方氏凡邦國千里封公  
以方五百里則四公方四百里則六侯方三百里則  
七伯方二百里則二十五子方百里則百男以周知  
天下周易師上六大君有命開國承家

大封告后土禮

大宗伯王大封則先告后土大祝建邦國先告后土用  
牲幣

經禮補逸卷七



欽定四庫全書會要卷二十四十四

經部

經禮補逸卷八

元 汪克寬 撰

賓禮

朝禮

周禮大宗伯春見曰朝大行人春朝諸侯而圖天下之事  
幕人凡朝覲共其帷幕幄帟綬掌次諸侯朝覲則張大次  
小次小臣朝覲沃盥司几筵凡大朝覲王設位黼依依  
前南向設莞筵紛純加繅席畫純加次席黼純左右玉几

典瑞公執桓圭侯執信圭伯執躬圭繅皆三采三就子執  
穀璧男執蒲璧繅皆二采再就以朝于王大史朝覲以書  
協禮事執書以詔王司士正朝儀之位辨其貴賤之等三  
公北面東上孤東面北上卿大夫西面北上朝士掌外朝之  
法左九棘孤卿大夫位焉羣士在其後右九棘公侯伯子  
男位焉羣吏在其後面三槐三公位焉州長衆庶在其後  
愚案周官有三公三孤之官而周禮不言其職論者  
乃謂師氏保氏即大師大保鄉老二卿則公一人註

則以爲三公豈知師氏保氏乃中下大夫之職且未  
聞以傳稱而鄉老公一人乃置地官之列屬然則三  
公居六卿之上而遽以是爲三公之師保可乎據今  
朝士司士所稱是則周禮未嘗不言公孤也特以六  
卿而上兼公孤故不正言其職以繫六官之下爾參  
諸周書顧命曰召太保奭芮伯彤伯畢公衛侯毛公  
此蓋當時之六卿而奭以大保言毛畢以公言是以  
卿兼公故以公稱餘三人者以卿而兼孤又可以類

推也此不可不辨

大宗伯朝覲則爲上相大司寇凡朝覲前王大僕王視  
朝則正前位而退入亦如之射人朝覲作大夫介校人  
朝覲毛馬而頒之飾幣大司徒大賓客令野修道委積  
委人賓客共其芻薪小宗伯大賓客灌几筵築鬴贊果  
將鬱人掌賓客之裸事和鬱鬯以實彝而陳之旄人凡  
賓客舞燕樂籥師祭祀則鼓羽籥之舞賓客則亦如之  
餘人掌治備見  
燕饗賓客禮下大行人以九儀辨諸侯之命等諸臣之

爵以同邦國之禮上公之禮執桓圭九寸縹藉九寸冕服九章建常九旂樊纓九就貳車九乘介九人禮九牢其朝位賓主之間九十步立當車軹擯者五人諸侯之禮執信圭七寸縹藉七寸冕服七章建常七旂樊纓七就貳車七乘介七人禮七牢朝位賓主之間七十步立當前疾擯者四人諸伯執躬圭其他皆如諸侯之禮諸子穀璧五寸縹藉五寸冕服五章建常五旂樊纓五就貳車五乘介五人禮五牢朝位賓主之間五十步立當

車衡擯者三人諸男執蒲璧其他皆如諸子之禮凡諸侯之卿其禮各下其君二等以下及其大夫士皆如之邦畿方千里其外方五百里謂之侯服歲一見又其外方五百里謂之甸服二歲一見又其外方五百里謂之男服三歲一見又其外方五百里謂之采服四歲一見又其外方五百里謂之衛服五歲一見又其外方五百里謂之要服六歲一見

愚案大司馬曰九畿職方氏曰九服服言服事天子

畿猶疆限之謂其方里則同也參之周官乃曰六服

五服何邪葛氏註謂侯甸男采衛并畿內爲六服程

氏伯圭釋謂五服蓋指甸男采衛要而侯服不在其

數二說皆未安案大行人六服侯甸男采衛要是知

要服即蠻服也其曰五服一朝者要服不與其列其

曰九服而來朝者亦止五服蓋衛服之外聖人雖制

之服今蕃國世一見而不必其來非若五服一歲至

五歲各以所貢來見也考之武成止曰邦甸侯衛酒

誥康王之誥止曰侯甸男衛康誥亦止曰侯甸男采衛而蠻夷鎮蕃不與焉於此不必辨其服之異而自得其說之同矣

司儀掌九儀之賓客擯相之禮將合諸侯則令爲壇三成宮旁一門詔王儀南向見諸侯土揖庶姓時揖異姓天揖同姓及其擯之各以其禮

愚案大行人司儀掌九儀賓客擯相之禮而置司寇刑官之屬其稱名也不幾於雜乎徐考六官之中若



此者衆如司士掌羣官之版正朝廷之位而屬司馬之類是已論者率謂六官互相聯屬故六屬互相參錯然也豈知聯屬者此固周官立法之善然參錯者則未必若是其不倫也又案小宰記六官六屬各六十秋官自大司寇以下尚六十五人其職屬多寡不同初無是也要亦後之編錄散帙者不免遞相差易故爾觀者察焉

小行人令諸侯春入貢王親受之各以其國之籍禮之

凡諸侯入王則逆勞于畿及郊勞胝館將幣爲承而擯

曲禮天子當宁而立諸公東面諸侯西面曰朝

鄭注春朝受摯

於朝受享於廟疏曰凡天子三朝一在路門內謂之燕朝大僕掌之一是路門外之朝謂之治朝司士掌之其三是臯門之內庫門之外謂之外朝朝士掌之

愚案天地位而尊卑定矣卑高陳而貴賤位矣王者首出庶物德配二儀其尊貴明矣而聖人所恃以爲天下者不獨恃其尊貴勢分也故於諸侯之卑其中同姓則有伯父叔父焉異姓則有伯舅叔舅焉有兄

弟焉有婚姻焉於其來朝也逆勞眡館具備多儀篤以親親之恩接以主賓之禮而恩禮雖雖乎尊貴勢分之間有莫知其德之感化之至也此春朝所以異乎覲禮之受於廟而臣皆北面也夫執事貢諸侯所以述職也今也親受之於朝其志重於器物者明尊賢之禮等也祭器天子所以事神也今焉用之於大饗其致敬於賓客者示神事之禮同也若是者豈天子自示寡昧而忘其尊卑之分哉蓋以億兆歸命于一

人未易遽化也治亂潛幾於一德而一德難乎遽孚也於是崇德率衆謙已下賢俾上之恩深下之報厚內外同獎於一心遠近咸歸於一德卒致垂拱成化享國永年而能保其尊貴者有由來矣此所以爲三代之至文朝見之盛禮也

書周官六年五服一朝王制天子無事與諸侯相見曰朝考禮正刑一德以尊天子曲禮君天下曰天子朝諸侯分職受政任功曰予一人諸侯見天子曰臣某侯某

案此擯者告天子之辭也凡自稱皆曰寡人

樂記朝覲然後諸侯知所以臣

春秋隱公十一年春滕侯薛侯來朝哀公二年夏滕子來朝

愚案春秋書朝三十有六始於滕薛終於滕子然當時或受其朝禮而不報或累往不納而以歸厚薄䟽數之節不惟無合於先王殷聘世朝之儀而諸侯於天子述職之典蓋缺如也經皆書而不削以示強弱安危是非邪正爲後世鑒也

覲禮

大宗伯秋見曰覲大行人秋覲以比邦國之功小行人  
令諸侯秋獻功王親受之各以其國之籍禮之訝士邦  
有賓客則與行人送逆之入於國則爲之前驅而辟野  
亦如之居館則帥其屬而爲之蹕小司徒乃頒比法于  
六鄉之大夫使各登其鄉之衆寡六畜車輦辨其物鄉  
師以國比之法以時稽其夫家衆寡辨其老幼貴賤廢  
疾馬牛之物若國大比則考敎察辭稽器展事以詔誅

賞曲禮天子當依而立諸侯北面而見天子曰覲

案秋

受之於廟覲者位於廟門外而序入詩韓侯入覲以其介圭入覲于王

大雅

韓奕篇

春秋左傳襄公三十一年子產曰諸侯賓至甸設

庭燎詩韓奕篇韓侯入覲以其介圭入覲于王覲禮諸侯辭于天子王曰伯父無事歸寧乃邦

愚案此諸侯入辭而天子告之之辭也忠厚警戒藹然見之參之書文侯之命曰父義和其歸視爾師寧爾邦其義同也

宗禮

大宗伯夏見曰宗大行人夏宗以陳天下之謨司會以九貢之法致邦國之財用以九賦之法令田野之財用以九功之法令民職之財用以九式之法均節邦之財用以周知四國之治大司徒施十有二教焉一曰以祀禮教敬則民不苟二曰以陽禮教讓則民不爭三曰以陰禮教親則民不怨四曰以樂禮教和則民不乖五曰以義辨等則民不越六曰以俗教安則民不偷七曰以



刑教中則民不隳八曰以誓教恤則民不怠九曰以度  
教節則民知足十曰以世事教能則民不失職十有一  
曰以賢制爵則民慎德十有二曰以庸制祿則民興功  
齊僕以宗遇皆乘金路其法儀各以其等爲車送逆之  
節詩朝宗于海

遇禮

大宗伯冬見曰遇大行人冬遇以協諸侯之慮掌交掌  
以節與幣巡邦國之諸侯道王之德意志慮使咸知王

之好惡曲禮諸侯未及期相見曰遇春秋隱公四年夏

公及宋公遇于清

莊公三十二年夏宋公齊侯遇于梁丘

愚案古者諸侯朝覲于王不期而遇諸塗則舉相見之禮猶存恭肅之心若春秋書遇則皆惡其簡禮之私而無合乎先王制禮之意也

時會禮

大宗伯時見曰會大行人時會以發四方之禁大宗伯會同則爲上相大司馬會同則帥士庶子而掌其政令

小司馬會同掌其事如大司馬之法射人會同作大夫  
介諸子凡會同作羣子從司士凡會同作士從小祝凡  
外內小會同掌事焉旅賁氏掌執戈盾夾王車而趨左  
八人右八人凡會則服而趨車僕凡師共草車各以其  
萃會同亦如之虎賁氏掌先後王而趨以卒伍軍旅會  
同亦如之司兵軍事建車之五兵會同亦如之司常掌  
九旗之物名各有屬凡祭祀各建其旗會同亦如之典  
路凡會同以路從司戈會同授貳車戈盾建乘車之戈

盾授旅賁及虎氏戈盾掌次諸侯會同則張大次小次  
幕人凡會同共其帷幕幕幄帟綬掌舍掌王會同之舍設  
櫜柙再重設車宮轅門爲壇壝宮棘門爲帷宮設旌門  
外府凡會同共其財用之幣齎賜予之財用廩人凡邦  
有會同之事則治其糧與其食遺人凡會同掌其道路  
之委積校人凡會同毛馬而頒之飾幣馬射鳥氏掌祭  
祀以弓矢毆鳥鳶凡會同亦如之戎右會同充草車司  
右凡會同合其車之卒伍而比其乘屬其右牛人凡會

同共其兵車之牛稍人若有會同則以縣師之法作其  
司徒轡輦帥而至縣師若將有會同之戒則受法于司  
馬以作其衆庶及馬牛車輦會其軍人之卒伍使皆備  
旗鼓兵器以帥而至司弓矢凡會同頒弓弩各以其物  
從授兵車之儀大司馬以九伐之法正邦國馮弱犯寡  
則書之賊賢害民則伐之暴內凌外則壇之野荒民散  
則削之負固不服則侵之賊殺其親則正之放弑其君  
則殘之犯令陵政則杜之外內亂鳥獸行則滅之大司

寇凡會同前王小司寇乃宣布于四方憲刑禁士師掌  
國之五禁一曰宮禁二曰官禁三曰國禁四曰野禁五  
曰軍禁布憲執旌節以宣布于四方而憲邦之刑禁掌  
交以諭九禁之難曲禮諸侯相見於郤地曰會春秋隱  
公二年公會戎于潛哀公十三年夏公會晉侯及吳子  
于黃池

愚案時會謂時見也發禁者凡諸侯有不順服王則  
合諸侯而發其禁令以行征討之事如九伐之法此

先王時會之禮也春秋書會九十五始於潛終於黃  
池中間彼善於此僅有蕭魚之特筆餘皆非王事而  
私會殊非周官入會致事禁止不義之制矣故曰凡  
書會皆譏也

殷同禮

大宗伯殷見曰同大行人殷同以施天下之政小行人  
其禮俗政事之逆順每國辨異之以反命于王以周知  
天下之故大司馬掌建邦國之九法以佐王平邦國制

畿封國以正邦國設儀辨位以等邦國進賢興功以作  
邦國建牧立監以維邦國制軍詰禁以糾邦國施貢分  
職以任邦國簡稽鄉民以用邦國均守平則以安邦國  
比小事大以和邦國正月之吉始和布政于邦國都鄙  
乃縣政象之法于象魏使萬民觀政象

愚案周禮冬官久亡於象法之縣否無可考也餘四  
官皆縣象法而何獨宗伯略焉蓋冢宰司徒司馬司  
寇之所職曰治曰教曰政曰刑此皆親民之事故各



縣象法以示之若宗伯所職曰禮曰樂率皆朝廷宗廟之事於民爲踈遠而且禮樂實本諸人心之和順非可以象求故略之無庸縣可也或曰治教政刑皆可縣象於一時而禮樂之器之文其爲品節制度此獨不可以一二象法示人而塗斯民耳目於無聞見之地邪曰六藝十二教之目禮樂具述其中而五禮六樂中和之教以防萬民之情僞者爲尤著是以禮樂示斯民之教者固已縣諸地官司徒之教法而宗

伯則以朝廷宗廟之禮樂爲專職焉學者於此無徒  
事乎器物示人之麤迹而必求之人心之和順以推  
原聖人制作之微意則禮樂中和之教法不獨縣諸  
司徒而有得於吾心之實者縣象昭昭矣因并釋之  
乃以九畿之籍施邦國之政職方千里曰國畿其方五  
百里曰侯畿又其外方五百里曰甸畿又其外方五百  
里曰男畿又其外方五百里曰采畿又其外方五百里  
曰衛畿又其外方五百里曰蠻畿又其外方五百里曰

夷畿又其外方五百里曰鎮畿又其外方五百里曰藩  
畿凡令賦以地與民制之

時聘禮

大宗伯時聘曰問大行人時聘以結諸侯之好小行人  
合六幣圭以馬璋以皮璧以帛琮以錦琥以繡璜以黼  
此六物者以和諸侯之好典瑞琬圭以結好掌交掌邦  
國之通事而結其交好曲禮諸侯使大夫問於諸侯曰  
聘春秋隱公七年齊侯使其弟年來聘

愚案古者諸侯間於天子之事則有使問之聘詳見儀禮篇春秋諸侯朝禮不修閒自相聘書於經者二十五始於弟年終於士執皆惡其挾邦交之私非時聘結好之禮故觀年之書法則可以推其餘矣

殷覲禮

大宗伯殷覲曰視大行人殷覲以除邦國之慝王之所以撫邦國諸侯者三歲徧覲小行人其悖逆暴亂作慝猶犯令者每國辨異之以反命于王以周知天下之故

典瑞璪圭璋璧琮繅皆二采一就以規聘琰圭以除慝  
誦訓掌道方慝以詔辟忌以知土俗王巡守則先王車  
匡人掌達法則匡邦國而觀其慝

閒問禮

大行人閒問以諭諸侯之志掌大賓之禮以親諸侯上  
公之禮三問三勞諸侯之禮一再問再勞諸伯如諸侯之  
禮諸子之禮壹問壹勞諸男如諸子之禮掌交掌以節  
與幣巡邦國之諸侯道王之德意志慮使咸知王之好

惡誦訓掌道方志以詔觀事擇人掌誦王志道國之政  
事以巡天下之邦國而諭之

贊貢禮

大行人侯服其貢祀物甸服其貢嬪物男服其貢器物  
采服其貢服物衛服其貢材物要服其貢貨物

將幣禮

大行人上公廟中將幣三享王禮再裸而酢諸侯廟中  
將幣三享王禮一裸而酢諸伯如諸侯之禮諸子廟中

將幣三享王禮一裸不酢諸男如諸子之禮小行人凡諸侯入將幣爲承而擯司儀掌九儀賓客擯相之禮公於上等侯伯於中等子男於下等其將幣亦如之

饗食禮

大行人上公饗禮九獻食禮九牢出入五積諸侯饗禮七獻食禮七牢出入四積諸伯如諸侯之禮諸子鄉食禮五獻食禮五牢出入三積諸男如諸子之禮

錫命禮

大宗伯王命諸侯則擯典命掌諸臣之五等之命上公  
九命爲伯其國家宮室車旗衣服禮儀皆以九爲節侯  
伯七命其國家宮室車旗衣服禮儀皆以七爲節子男  
五命其國家宮室車旗衣服禮儀皆以五爲節王之三  
公八命其卿六命其大夫四命及其出封皆加一等其  
國家宮室車旗衣服禮儀亦如之書說命命之曰朝夕  
納誨以輔台德止欽予時命其維有終微子之命王若  
曰爾惟踐修厥猷舊有令聞恪慎克孝肅恭神人予嘉



乃德曰篤不忘上帝時歆下民祗協庸建爾于上公尹  
茲東夏欽哉往敷乃訓慎乃服命蔡仲之命王若曰小  
子胡惟爾率德改行克慎厥猷肆予命爾侯于東土往  
即乃封敬哉畢命王曰嗚呼父師今予祗命公以周公  
之事往哉同命曰今予命汝作大正正于羣僕侍御之  
臣懋乃后德交修不逮文侯之命王曰父義和其歸視  
爾師寧爾邦用賚爾秬鬯一卣彤弓一彤矢百盧弓一  
盧矢百馬四匹父往哉柔遠寧邇惠康小民無荒寧簡

恤爾都用成爾顯德周易師九二王三錫命晉康侯用  
錫馬蕃庶晝日三接詩韓奕韓侯受命王親命之王錫  
韓侯淑旂綏章彤弓彤弓受言藏之我有嘉賓中  
心貺之采菽君子來朝何錫予之雖無予之路車乘馬  
又何予之玄衮及黼春秋莊公元年王使榮叔來錫桓  
公命

愚案周制諸侯踐位而入見則有錫命修聘來朝則  
有錫命能敵王所愾而獻功則有錫命此禮之正也

若書稱蔡仲之命文侯之命詩稱王錫韓侯王命召  
虎之類是已若遣使就其國而錫命之禮無是也如  
春秋書王使榮叔來錫桓公命天王使毛伯來錫公  
命之類皆非正也比事以觀義自見矣

左傳僖公二十八年王享醴命晉侯宥賜之大路之服  
戎路之服文公四年甯武子曰諸侯敵王所愾而獻其  
功於是乎賜之彤弓一彤矢百玃弓矢千何氏曰禮有  
九錫一車馬二衣服三樂則四朱戶五納陛六虎賁七

弓矢八鈇鉞九拒鬯

王制天子賜諸侯樂則以祝將之賜伯子男樂則以鼗  
將之諸侯賜弓矢然後征賜鈇鉞然後殺賜圭瓚然後  
爲鬯

經禮補逸卷八

謹案卷六第四頁後七行子服景伯至刊本景訛  
京今據左傳改

第五頁前七行降服乘縵徹樂出次祝幣史辭而  
禮焉刊本遺樂字今據左傳增

卷七第三頁後六行誅後至者刊本誅訛追今據  
周禮改

第四頁後一行道車載籥刊本載訛建今據周禮  
改

第十四頁前六行諸侯敵王所懷而獻其功刊本

敵訛獻今改

第二十頁前一行王大封則先告后土刊本告訛  
君今改

卷八第六頁前二行接以主賓之禮刊本賓訛擯  
今改

第八頁前三行甸設庭燎刊本甸訛甸今據左傳  
改


第九頁前六行遇禮刊本缺遇字

第十頁後七行以弓矢毆鳥鳶刊本毆訛歐今改  
第十五頁後一行誦訓掌道方志刊本誦訓訛訓  
誦今據周禮改

第十七頁後八行能敵王所懷刊本懷訛餽今改







覆校官編修臣查 瑩

校對官檢討臣龔大萬

謄錄監生臣賈捷三

謄錄舉人臣汪志伊

欽定四庫全書薈要

經部  
經禮補逸卷九

詳校官編修臣程嘉謨



欽定四庫全書薈要卷二十四十五

經部

經禮補逸卷九

元 汪克寬 撰

嘉禮

飲食禮

 宗伯以飲食之禮親宗族兄弟小宗伯掌三族之別

以辨親疎大僕王燕飲則相其法小臣饗食掌事如大僕之法鍾師凡饗食奏燕樂罇師凡祭祀鼓其金奏之樂饗食亦如之籥師祭祀則鼓羽籥之舞饗食則亦如

之文王世子若公與族燕則異姓爲賓膳宰爲主人公與父兄齒族食世降一等公與族燕則以齒而孝悌之道達矣其族食世降一等親親之殺也

愚謂盛哉先王之禮也其本在於養性防欲其用在於視聽言動周旋揖遜之間使人之視聽言動周旋揖遜一於禮則安有放其邪心驕奢淫佚蕩而莫之節者哉不放其邪心不驕奢淫佚蕩而莫之節則禍亂可息孝弟可行治教可興其立意微其爲法遠矣

故設其器備其物辨其數立其文以待其有事者其  
用則在乎視聽言動周旋揖遜之間而已然孝弟莫  
始於親親親親之心無所不用則燕之之禮不得而  
廢焉燕之之禮不得而廢則設其器備其物辨其數  
立其文以待其有事者於是而用之也是故莫尊乎  
君也君雖尊不以位加於父兄燕序必以齒者達乎  
孝弟之道也莫親乎同姓也然親親不可以無殺燕  
則族人世降一等焉凡燕之禮必主賓以備酬酢而

族燕之賓主則異姓與膳宰爲之者篤親親之道也  
夫飲食口腹之欲也而必節之以禮則驕奢淫佚平  
而無過也歌舞耳目之欲也而必和之以樂則言動  
揖遜易而無乖也莫不由親以篤乎恩有恩以著乎  
愛有愛以盡其禮盡其禮則言動視聽周旋揖遜之  
間不徒接乎耳目所以服習而安之者自得於養性  
防欲之幾也雖然不特宗族兄弟之親也遠而異姓  
諸侯之君臣以至於蠻貊夷狄之邦皆由是禮之行

故人說而天下服矣人說而天下服則禍亂何由作  
苟禍亂不作則孝弟行而治教興矣此乃先王之所  
以爲燕也嗚呼於此可以觀其禮之盛矣

月令季冬之月命樂師大合吹而罷

註歲將終與族人大  
飲作樂於大寢以綴

也王居明堂禮季冬命國爲酒以合三族大傳上治祖

禰下治子孫旁治昆弟合族以食序以昭繆穆別之以

禮義人道竭矣

愚案此言繼祖收族之禮故有上治下治旁治之道

以正其恩之隆殺屬之戚疏也蓋合族以食使之有所同而尊卑之禮一序以昭穆使之有所異而親疎之義明如此則皆有禮義之別而人之道盡於此矣抑嘗論之大宗無子則族人以支子爲之後爲所後服斬衰三年而降本親父母爲期何也蓋於所後者以尊服服之又爲降己親之服所以明所後者之爲重而於大宗者上以繼祖下以收族不可以絕此聖人制禮之意也或謂爲人後者當易其父母之名從



所後者爲屬而使之無二是未考於禮也蓋父母之服當降使明所後者重而已非遂以謂當變其親也親不當變則名可得而易乎名不可得而易則期服雖除心喪三年禮不可變也而謂輒可以絕其親乎不絕其親而能使其屬之疏者相與爲重親之厚者相與爲輕在以禮義明其內而不在於惡其爲二而強易其名於外也雖然降父母之服禮則有之矣絕父母之名禮未之前聞也禮喪服齊衰不杖期章曰

爲人後者爲其父母服此其名之見於經未嘗易也  
經既不易則凡爲人後者生曰本親父母沒曰考妣  
禮之正也愚故因昭穆之別特附其說於下以俟知  
禮者商確焉

詩棠棣篇賓爾邊豆飲酒之飲兄弟既具和樂且孺伐  
木篇伐木許許醴酒有藇既有肥羜以速諸父頌弁爾  
酒既旨爾殽既嘉豈伊異人兄弟匪他

冠禮

大宗伯以冠昏之禮親成男女禮記郊特牲冠義始冠之緇布之冠也大古冠布齊則緇之其緌也適子冠於阼以著代也無大夫冠禮古者五十而後爵何大夫冠禮之有諸侯之有冠禮夏之末造也天子之元子士也天下無生而貴者也繼世以立諸侯象賢也內則二十而冠玉藻始冠緇布冠自諸侯下達冠而敝之可也玄冠朱組纓天子之冠也緇布冠纁緌諸侯之冠也冠義曰冠者禮之始也是故古者聖王重冠古者冠禮筮日

筮賓所以敬冠事敬冠事所以重禮重禮所以爲國本也重冠故行之於廟行之於廟者所以尊重事

三加冠禮

郊特牲醯於客位嘉有成也三加彌尊喻其志也冠而

字之敬其名也委貌周道也章甫殷道也毋牟追推夏

后氏之道也

此始加之冠也

周弁殷皐

謂

夏收

此三加之冠也

三王共

皮弁素積

此論再加之冠也

士冠禮始加祝曰令月吉日始加

元服棄爾幼志順爾成德壽考維祺介爾景福再加曰

吉月令辰乃申爾服敬爾威儀淑慎爾德靡壽萬年永  
受胡福三加曰以歲之正以月之令咸加爾服兄弟具  
在以成厥德黃耆無疆受天之慶

昏禮

大宗伯以冠昏之禮親成男女媒氏掌萬民之判凡男  
女自成名以上皆書年月日名焉令男三十而娶女二  
十而嫁凡娶判妻入子者皆書之黨正凡黨之昏冠教  
其禮事掌其戒禁

愚案妻由判合故云判子者謂媵娣之類非聘之正故云入夫國之男女至衆也年月日名自成名以上皆書之及其判入又書日月以告君禮不幾於繁乎詎知先王之制所以厚男女之別正婚姻之禮者其馭人倫謹始之道至簡而要也夫自有別推而至於萬物安則禮始於謹夫婦者繫於國之男女況於南面天下之主哉是故古之君子未嘗不以身化也故家人之義歸於反身二南之業本於文王世皆知

內而后妃有闕睢之行外而羣臣有二南之美而不  
知其謹始由於文王之身化也考之行露之詩野有  
死麕之作專言男女貞潔強暴不能侵陵彼乘約肆  
淫丈夫尚不能安其守顧令天下之女子能之何其  
盛也人徒見江漢之小國免置之野人莫不蒙化而  
善俗而不知其所以然者又本諸先王教化之行禮  
制之謹有以致之也於此可以觀禮而得其要矣  
曲禮故日月以告君齊戒以告鬼神爲酒食以召鄉黨

僚友以厚其別也郊特牲夫昏禮萬世之始也娶於異姓所以附遠厚別也告之以直信信事人也信婦德也一與之齊終身不改故夫死不嫁曾子問娶婦之家三日不舉樂思嗣親也禮記昏禮不賀人之序也

問名禮

媒氏掌凡男女自成名以上皆書年月日名焉曲禮男女非有行媒不相知名

納幣禮



媒氏凡嫁子娶妻入幣純帛無過五兩曲禮非受幣不交不親郊特牲幣必誠辭無不腆

摯見禮

郊特牲執摯以相見敬章別也

案執摯所奠鴈也

表記無禮不

相見也欲民之無相褻也

親迎禮

郊特牲男子親迎男先於女剛柔之義也天先乎地君先乎臣其義一也壻親御授綏親之也親之也者親之

也敬而親之先王之所以得天下也出乎大門而先

去聲

男帥女女從男夫婦之義由此始也禮記哀公問冕而親迎不已重乎孔子對曰合二姓之好以爲宗廟社稷主君何謂已重乎詩大明篇文定厥祥親迎于渭韓奕篇韓侯取妻汾王之甥蹶父之子韓侯迎止于蹶之里見舅姑禮

昏義夙興婦沐浴以俟見質明贊見婦於舅姑婦執笄棗栗段修以見贊醴婦婦祭脯醢祭醴成婦禮也舅姑

入室婦以特豚饋明婦順也郊特牲厥明婦盥饋舅姑卒食舅姑降自西階婦降自阼階

見廟禮

禮記曾子問三月而廟見稱來婦也擇日而祭禰成婦之義也

愚案禮舅姑存成婚明日婦見舅姑共盥饋之禮此成昏三月擇日祭禰者則舅姑已沒而婦見于廟也非謂廟見後擇日又祭也婦人謂嫁曰歸故稱來婦

詩謂之子于歸易言歸妹是矣曰成婦之義者謂生  
既不獲共養于舅姑廟祭亦如生成盥饋之禮明敬  
事之當完故曰成婦之義也考之昏義婦見舅姑贊  
醴婦祭脯醢祭醴明敬事自此始故曰成婦之禮  
也此雖存沒不同亦皆互文以見義耳然則見廟必  
待三月者父母既沒爲人子者謂婦之來以成絲麻  
布帛以審守委積蓋藏者其事也和室人當於夫在  
中饋者其行也上以奉宗廟下以繼後世此又禮之

重也職或不修有可去之事則不可以苟合也故必待久觀其成婦之道而後廟告焉此亦致敬於其所事也

### 賓射禮

大宗伯以賓射之禮親故舊朋友大司樂及射令奏騶虞大僕王射則贊弓矢小臣賓射掌事如大僕之法鍾師凡射王奏騶虞鍾師凡祭祀鼓其金奏之樂賓射亦如之眡瞭賓射皆奏其鐘鼓鼗典庸器祭祀帥其屬而

設筍虞陳庸器賓射亦如之大史凡射事節中舍筭執其禮事司常凡射共獲旌射人治射儀王以六耦射三侯三獲三容樂以騶虞九節五正諸侯以四耦射二侯二獲二容樂以貍首七節三正孤卿大夫以三耦射一侯一獲一容樂以采蘋五節二正士以三耦射一獲一容樂以采芣五節二正服不氏射則贊張侯以旌居乏而待獲禮記射義故射者進退周旋必中禮內志正外體直然後持弓矢審固持弓矢審固然後可以言

中此可以觀德行矣

祭侯禮

射人祭侯則爲位梓人張皮侯而棲鵠則春以功張五采之侯則遠國屬張獸侯則王以息燕祭侯之禮以酒脯醢其辭曰惟若寧侯毋或若女不寧侯不屬于王所故抗而射女強飲強食詒女曾孫諸侯百福書曰侯以明之

燕賓禮

樂記射鄉食饗所以正交接也射義古者諸侯之射也  
必先行燕禮卿大夫士之射也必先行鄉飲酒之禮故  
燕禮者所以明君臣之義也鄉飲酒之禮者所以明長  
幼之序也詩小雅賓之初筵發彼有的以祈爾爵狸首  
篇以燕以射則燕則譽

愚案古者弦木爲弧剡木爲矢弧矢之利以威天下  
見於易繫侯以明之載於虞書則射藝已見於黃帝  
堯舜之時而其制度禮文則大備於周也何哉鄉三



物之爲教也曰六德曰六行曰六藝蓋蓄德植行而必播之以六藝射之所以爲藝而次于禮樂者有足以成人之德行而觀其用舍者也古者天子以射選諸侯卿大夫士以中選之多寡爲之慶讓蓋亦主乎習藝觀德之成而不專寓於禦侮克敵之備也諸侯之射必先行燕禮卿大夫士之射必先行鄉飲酒之禮此則飾之以禮所以明君臣之義長幼之序也其節天子以騶虞諸侯以貍首卿大夫士以采蘋采芣此

則飾之以樂又所以養人之德使之周還中禮而各不失其節之志也故明乎此則事功成而德行立矣事功成而德行立則暴亂不作暴亂不作則身安而國家可保矣學者於此念始生桑弧蓬矢六以射天地四方必先有志於其所事勉乎心之所得身之所存事之所習以趨乎進德之階窮理之地而不愧於爲男子者噫豈維射哉因并釋之

燕饗禮

大宗伯以燕饗之禮親四方之賓客邊人賓客之事共其薦脩之邊實醢人賓客之禮共醢五十甕醢人賓客之禮共醢五十甕外府凡賓客共其財用之幣齎大司徒大賓客令野脩道委積封人凡賓客則飾其牛牲牛人凡賓客之事共其牢禮積膳之牛司門凡四方之賓客造焉則以告委人賓客共其芻薪澤虞凡賓客共澤物圉人凡賓客共其生獸死獸之物場人凡賓客共其瓜蒌鬱人掌賓客之祿事和鬱鬯以實彝而陳之司服

凡賓客共其衣服而奉之典瑞凡賓客之事共其玉器而奉之鐘師凡饗食奏燕樂旄人凡賓客舞燕樂鎛師凡祭祀鼓其金奏之樂饗食亦如之籥師祭祀則鼓羽籥之舞饗食則亦如之司干祭祀舞者既陳則授舞器賓饗亦如之鞀韘氏祭祀則歛而舞之燕亦如之典庸器祭祀帥其屬而設筍虡陳庸器饗食亦如之司常掌九旗之物名各有屬凡祭祀各建其旗賓客亦如之大司馬饗食羞牲魚授其祭小司馬饗射掌其事如大司

馬之法量人凡饗賓制其從獻脯燔之數量羊人凡賓客共其法羊射鳥氏掌祭祀以弓矢毆鳥鳶凡賓客亦如之服不氏賓客之事則抗皮射人賓客則作卿大夫從司士凡賓客作士從諸子凡賓客作羣子從旅賁氏掌執戈盾凡賓客則服而趨大僕王燕飲則相其法王眡燕朝則正位掌擯相王不眡朝則辭於三公及孤卿小臣正王之燕服位王之燕出入則前驅士師王燕出入則前驅而辟掌客掌四方賓客之牢禮飲食之等數

凡諸侯之禮上公五積皆眡殮牽三問皆脩殮五牢食四十簋十豆四十鉶四十有二壺四十鼎簋十有二牲三十有六皆陳饗餼九牢其死牢如殮之陳牽四牢米百有二十鬯醢醢百有二十甕車皆陳車米眡生牢牢十車車秉有五簋車米眡死牢牢十車車三秬芻薪倍禾皆陳乘禽日九十雙殷膳大牢以及歸三饗三食三燕若弗酌則以幣致之侯伯四積皆眡殮牽再問皆脩殮四牢食三十有二簋八豆三十有二鉶二十有八壺

三十有二鼎簋十有二腥二十有七皆陳饗餼七牢其  
死牢如殮之陳牽三牢米百筥醯醢百甕皆陳米三  
十車禾四十車芻薪倍禾皆陳乘禽日七十雙殷膳大  
牢三饗再食再燕子男三積皆眡殮牽一問以脩殮三  
牢食二十有四簋六豆二十有四鉶十有八壺二十有  
四鼎簋十有二牲十有八皆陳饗餼五牢其死牢如殮  
之陳牽二牢米八十筥醯醢八十甕皆陳米二十車禾  
三十車芻薪倍禾皆陳乘禽日五十雙一饗一食一燕

凡諸侯之卿大夫士爲國客則如其介之禮以待之詩  
湛露厭厭夜飲在宗載考彤弓鍾鼓既設一朝饗之鹿  
鳴我有旨酒以燕樂嘉賓之心春秋莊公四年夫人饗  
齊侯于祝丘

愚案春秋傳晉侯饗齊侯宋公饗晉侯楚子饗公小  
邾子邾子來朝公與之燕公饗宰周公范宣子饗晉  
六卿于蒲圃甯俞華耦來公與之燕至鄭伯饗王王  
饗晉侯經皆不書而書夫人饗齊侯則以其非禮也



# 餼獻禮

掌客掌四方賓客之餼獻飲食之等數上公之禮羣介  
行人宰史皆有牢及歸凡介行人宰史皆有殮饗餼以  
其爵等爲之牢禮之陳數唯上介有禽獻夫人致禮八  
壺八豆八邊膳大牢致饗大牢食大牢卿皆見以羔膳  
大牢侯伯凡介行人宰史皆有殮饗餼以其爵等爲之  
禮唯上介有禽獻夫人致禮八壺八豆八邊膳大牢致  
饗大牢卿皆見以羔膳特牛子男凡介行人宰史皆有

殮饗餼以其爵等爲之禮唯上介有禽獻夫人致禮六  
壺六豆六邊膳眡致饗親見卿皆膳特牛

擯相禮

司儀掌九儀之賓客擯相之禮以詔儀容辭令揖讓之  
節凡諸公相爲賓主國五積三問皆三辭拜受皆旅擯  
主君郊勞交擯三辭及將幣交擯三辭車逆拜辱賓車  
進荅拜三揖三讓每門止一相及廟唯上相入賓三揖  
三讓登再拜授幣及出車送三請三進再拜賓三還三

辭告辟諸公之臣相爲國客則三積皆三辭拜受及大  
夫郊勞旅擯三辭拜辱三讓登聽命下拜登受賓使者  
如初之儀及將幣旅擯三辭拜逆客辟三揖每門止一  
相及廟唯君相入三讓客登拜客三辟授幣下出大僕  
王燕飲則相其法王眡燕朝則正位掌擯相玉藻小國  
之君曰孤擯者亦曰孤上大夫曰下臣擯者曰國君之  
老下大夫自名擯者曰寡大夫公士擯則曰寡大夫寡  
君之老大夫有所往必與公士爲賓也聘義卿爲上擯

大夫爲承擯士爲紹擯三讓而後傳命三讓而後入廟門三揖而後至階三讓而後升所以致尊讓也禮器禮有擯詔樂有相步溫之至也

送逆禮

訝士邦有賓客則與行人送逆之司儀王燕凡諸侯相爲國主賓主君郊勞交擯三辭車逆拜辱三揖三辭拜受車逆三還再拜及將幣車逆拜辱再拜授幣賓拜送幣及出車送諸公之臣相爲國客及大夫郊勞旅擯三

辭拜辱及退拜送及將幣拜逆客辟授幣下出君館客  
客辟介受命遂送凡四方之賓客禮儀辭命餽牢賜獻  
以二等從其爵而上下之凡賓客送逆同禮齊僕掌饗  
食皆乘金路其法儀各以其等爲車送逆之節環人掌  
送逆邦國之通賓客以路節達諸四方聘義君使士迎  
于竟大夫郊勞君親拜逆于大門之內而廟受北面拜  
貺拜君命之辱所以致敬也敬讓也者君子之所以相  
接也

勞禮

小行人凡諸侯入王則逆勞于畿及郊勞眡館司儀凡諸公相爲賓主國五積三問再勞三辭三揖登拜受拜送郊勞三辭諸公之臣相爲國客則三積郊勞三辭及禮私面私獻君勞客客再拜稽首君荅拜致饗餼如勞之禮曲禮大夫士見於國君君若勞之則還辟再拜稽首

致贈禮

司儀致饗餼還主饗食致贈及禮私面私獻皆再拜稽首君荅拜聘義君親禮賓賓私面私覲致饗餼還主璋賄贈饗食燕所以明賓客君臣之義也

愚案古者天子諸侯皆有朝聘之禮如大行人歲徧存三歲徧覲五歲徧省此天子所以撫諸侯之禮也春朝而圖天下之事時聘以結諸侯之好此諸侯所以事天子之禮也至於歲相問殷相聘世相朝此諸侯邦交之禮也禮若國君親往則大夫從王燕凡諸

公相爲賓主國其擯相禮儀餼牢賜獻各以其爵之  
等相待也聘事既畢主國君親執醴以禮賓而遂有  
私面私獻之禮賓皆再拜稽首所以正交接之義也  
致饗餼還主璋賄贈饗食燕者賓介就館主君使卿  
致饋於賓而還以執來之主加以賄贈之禮也然則  
大夫從君聘而以己之私物覲見主國之君面見主  
國之卿大夫可乎夫執圭所以申信也將幣所以致  
敬也私以庭實充于諸侯之庭則不敬也不敬是無



王矣夫既從君聘禮無外交也外交是二君矣此皆非禮也注者謂若大夫執其君之命圭而專使則當行私覲之禮以申已之信其說悖矣夫從君而來與受命而聘一也一乃專二乃辟也考之太宰以八柄詔王馭羣臣曰祿以馭其富予以馭其幸若相覲以貨是人臣以利交也人臣以利交則二者胥失矣二者苟失其不致於無禮奪亂者未之有也

賀慶禮

大宗伯以賀慶之禮親異姓之國大行人賀慶以贊諸侯之喜小行人若國有福事則令慶賀之玉藻有慶非君賜不賀士於大夫不承賀下大夫於上大夫承賀

脤膾禮

大宗伯以脤膾之禮親兄弟之國小宗伯饗食授祭大司馬饗食羞牲魚授其祭祭僕凡祭祀致福者展而受之大行人歸脤以交諸侯之福春秋昭公十四年天王使石尚來歸脤公羊傳脤者何俎實也脤曰脤熟曰膾

愚案受脤于社是諸侯助祭而授俎實也非助祭則不授也如襄王使宰孔賜齊侯胙是齊桓有獎王之功而加以殊禮也今天王使石尚賜宜社之內于魯非緣助祭於京師曾是以爲禮乎是故受脤禮也歸脤非禮也

經禮附說

周禮一書果爲周公所作乎漢武嘗謂周禮爲瀆亂不驗之書何休又云六國陰謀之書歐文忠公謂周

禮可疑者二蘇穎濱謂周禮不可信者三是皆論以爲非周公之遺制也然則周禮果非周公所作乎朱子蓋嘗以周家法度廣大精密言之嘗以周公建太平之基本稱之又嘗以周公從廣大心中流出稱之張橫渠謂周公治周莫詳於周禮賈公彥序周禮廢興又謂鄭玄徧覽羣經知周禮者乃周公致太平之迹是則又明爲周公所作也考之西漢志於周禮未之見東漢儒林傳乃謂周官經六篇本孔安國所獻

隋經籍志乃云漢時有李氏得周官上於河間獻王  
獨缺冬官一篇獻王購以千金不得遂以考工記補  
成六篇奏之孝武時蓋有其書特未與五經例置博  
士耳至西漢劉歆始置博士遂盛行於世後世因有  
周禮作於劉歆之說是則周禮作於周公而非他人  
之制明矣然冬官何爲而缺也經罹秦燄散帙之餘  
與漢儒編錄附麗之誤而始謂之缺也何以知其然  
愚因考補散逸得之夫五官所掌曰治曰教曰禮曰

政曰刑而冬官則掌邦土或坐而論道謂之王公或作而行之謂之士大夫或審曲面勢以飭五材以辨民器謂之百工通四方之珍異以資之謂之商旅飭力以長地財謂之農夫治絲麻以成之謂之婦功此冬官之大較也見考工記所載者其屬二十有九皆工之事而士與商農之職俱缺焉考之春官之中如世婦內宗外宗皆宮中之職本屬天官而乃入之春官夏官之中如司士諸子皆掌士之職本屬冬官而

乃入之夏官地官之中如司市質人廛人賈師司鹵  
司稽胥肆長泉府此皆主於商土均草人稻人場人  
司稼等職此皆主於農皆本屬冬官因其職與大司  
徒掌土地人民者相類乃以入之地官若是者謂非  
編錄附麗之誤不可也況小宰記六官六屬各六十  
考之天官自太宰以下六十二地官大司徒以下七  
十九春官大宗伯以下七十一夏官大司馬以下六  
十九秋官大司寇以下六十五何則冬官獨缺而爲

數不及五官皆盈而餘數過之理無是也他如儀禮有嗇夫之官國語有司商之官皆不載諸周禮此亦冬官之脫簡也要之見載於考工記者固爲冬官之屬然司空掌邦土居四民時地利職不止此當自大司空小司空而下撫夏官之中掌士者地官之中掌商農者與夫嗇夫司商之數并今考工記所載之工總屬冬官則不惟合於周官司空之所職與小宰六官六屬之目而且周公制作之盛粲然溢著于編使



人得以觀其會通而爲太平典禮之全書也克寬因  
并錄卷末以俟博古君子正焉

經禮補逸卷九

經禮補逸附錄

修史還鄉闕文

寧國府准太平府關該承准應天府牒文承奉尚書禮部符文欽奉聖旨置局編修元史已行纂成洪武二年八月十一日左丞相宣國公上表進呈御覽過欽奉聖旨編史儒士一十六名各與兩表裏銀三十二兩除存留外老病的送還鄉里欽此欽遵外數內儒士汪克寬等六名元係徽州紹興等府請到儒士擬合欽依送還

鄉里爲此省部除將各人元關號色繳回兵部外仰欽  
依聖旨事意即便應付船隻遞送還鄉仍行移前路官  
司一體應付遇陸路應付腳力接送無得失誤遲滯奉  
此當府除已應付外牒可依上應付順便船隻遞送還  
鄉仍行移前路官司一體應付如遇陸路一體應付接  
送施行毋得違誤蒙此當府除已應付外關請依上應  
付施行准此當府除已應付外合行移關請照驗煩爲  
依上應付順便船隻接送施行如遇陸路應付腳力接

送請勿遲滯須至闕者右闕徽州府

環谷汪先生行狀

先生諱克寬字德輔一字仲裕汪其姓也上世自歙縣之黃墩遷于祁門縣北之石山至諱釗徙居縣南之韓溪五傳有兄弟七人並有才名其第五子世容生深深生敏敏生黻黻生二子長若思無子以弟若谷子僑爲嗣僑補試中國學進士生煜煜生燦字明夫繼家學時羣從昆弟爲諸經講師學問文章槩範鄉邑從弟國學

進士東山府君華字榮夫嘗與其族兄二教府君相字  
魏大學于雙峯饒子之門饒乃勉齋先生黃文肅公高  
第弟子二教及東山問難扣懇悉得其蘊奧祁邑理學  
之盛自二公發之東山蚤歲又嘗從學鄱陽廬憲趙先  
生介如與故中書右丞五峯先生燕公楠爲同門至元  
初燕公僉江浙行中書省事道過祁門訪求東山與論  
舊故將薦諸朝東山固辭明夫無子東山有五子稔聞  
家庭之學明夫夫人王氏請其第三子應新字元美爲

嗣是爲中山處士記識博洽議論慷慨嘗著便民二十  
條力陳當世要務欲上之臺省不果聞者惜之處士娶  
同邑貢士石溪先生康鼎實第二女生五子次四是爲  
先生大德八年甲辰正月八日日初出先生生于桃墅  
里第生而有異處士君謂康夫人曰吾祖考積善陰德  
多矣或者食報於是兒興吾宗乎甫六歲石溪教之孝  
經論語孟子隨口成誦日記數百言後二年冬石溪謂  
處士君曰吾老矣不及教訓諸外孫汝第四子骨相非

凡宜擇師善教之自是先生從鄉先生學每屈其師日益月異至十歲處士君見先生所學彌進因取東山問學于饒先生講授之書及當時問答之言與先生觀玩遂於理學寔悟乃取朱子四書自定句讀晝夜誦讀恍然知爲學之要專勤異於儔輩或達旦不寢母夫人見先生勤苦太甚謂處士君曰是兒讀書過勤脫或因是致疾不可不戒處士君呼先生諭之曰讀書以養氣爲主不宜過勞先生曰某自樂此不爲勞也自是讀六經



諸子歷代史通鑑綱目等書悉皆成誦延佑四年丁巳

先生年十有四歲是秋鄉里傳錄江浙秋試三場題目  
先生一見揮筆成篇鄉先生驚異曰此天才也明年戊  
午郡守禮羅婺源道一書院山長雲峯胡先生炳文於  
郡庠開堂試以激厲後進先生屢中郡學及堂試與庠  
序諸老成相頡頏矣至壬戌春處士君同先生往饒之  
浮梁拜可堂吳先生仲迂于州學吳先生謂諸門人曰  
新安汪克寬遠來從遊穎異絕倫勇於爲學他日必有

所成及以所爲文印可於吳先生曰讀書明理蘄體諸  
身文章異時可不學而能也先生既得吳先生之訓遂  
篤志聖賢之學既歸葺故廬闢書齋于居室之東偏扁  
曰思復銘于齋壁以自勵焉次年吳先生講道武林勉  
先生充貢先生荅以吾斯之未能信躡等謀進某何敢  
然至泰定丙寅春間嚴陵吳先生朝陽以春秋登甲子  
進士第任番陽丞特往訪之朝陽先生聞其言喜曰子  
可謂真知作春秋之心法矣是秋邑長令聞先生學行

邁異時輩舉應江浙鄉試郎中前列次年春先生至京  
會試論春秋與主司不合又兼對策切直遂見黜于中  
書先生欣然南歸遂奉養之志時貢待制師泰曰德輔  
年妙而質純才優而學博賈勇秋闈即中高等上之春  
官輒不偶於主司是得之於數千人之中而失之於數  
千人之外天道之無常也先生歸自京師刻勵爲學痛  
自修飭遂厭科舉之文慨然曰道不行於當時矣乃取  
聖人手筆之春秋博考諸說之同異得失以胡文定公

之傳爲主而研究衆說會萃成書名之曰春秋經傳附錄纂疏翰林學士虞公序行於世易有程朱傳義音考詩有集傳音義會通禮有經禮補逸綱目有凡例考異其餘論著未可枚舉先生於經史聖賢之言心融神會造詣深劇故爲文略不經意而渾融典雅其教學者誘掖獎勸無不成人後以經學教授宣歙間數與師山先生鄭公講理論學意氣相得尚書巢深先生汪公謝事家居因遣其孫世賢執經先生之門四方學者知先生

道學之懿從遊甚衆先生嘗語學者曰聖賢之學以躬行踐履操存省察爲先至於文章特其餘事鰲峯玉署諸老交欲以文章舉薦而先生篤志著述不以一毫利祿動其心諸從學者以先生所居山谷園遶稱曰環谷四方學者皆曰環谷先生仍至元戊寅五月居室災先生夜半奉處士君遷於別室以居奉養備至是年九月處士君以疾卒先生哀毀踰禮至正壬辰蘄黃兵至先生率長幼避兵深山所居房舍資財爲賊焚掠殆盡簞

瓢屢空先生晏如也自是連歲兵戈擾攘至聖朝戡定禍亂先生始返故廬洪武三年正月朝廷命行人賁幣禮聘先生至京同翰林潛溪宋公刪修元史是年九月事畢特旨一班俱留祿仕先生以老疾力辭不受乃命禮部設宴賜白金三十兩采段二表裏給驛而還先生抵家以洪武五年壬子十有一月十二日卒年六十有九先生平居嘗語二子曰吾歿則祔于盛材之先塋其孤遂以是年某月日葬於其所遵治命也娶同邑聘君

和溪先生程公之女勤儉以相成其家業程夫人生與  
先生同年卒於先生前十九年癸巳五月八日子男二  
人曰希曰偕女二人長適同邑李傑夫蚤卒次適同里  
謝子原子原卒而守節誓終其身孫男六人銓鍾錠鉞  
鐸鐸國英蚤歲從學於先生訓迪最深辱知於先生最  
厚敬述其梗槩于右俾其孤乞銘於當世之名公以圖  
不朽焉門人長洲縣學教諭歙人吳國英撰

請春秋胡傳纂疏刊行啓

劉錦文

弱水蓬萊凝睇一方之隔泰山北斗馳心千里之瞻聊

憑尺素之恭敷布寸丹之瀆恭惟尊先生學通經傳道

貫古今明聖人筆削之書述而不作剖賢者異同之說

展也大成推爲人之盛心立垂世之大訓無附會糾纏

之失重文彩於奎章極根究取舍之嚴副袞袞於華族

尚書汪公澤民有序快四方之先覩續千載之不傳得雋棘闥久

報飛鈴之捷欲傳梓本幸母韞玉之藏倘沐允從無任

感激俾麟史昭然義見功必有歸將鳩工倏爾書成信



焉可失謹此申覆尚冀丙融

環谷精舍募助刊書疏

切見環谷先生所著書籍惟春秋纂疏及春秋考異刊  
于閩坊綱目考異始刊于萬川任氏書塾今刊于祁庠  
矣其餘如周易傳義音考二十六卷詩傳音義會通三  
十卷四書音證十卷俱有益後學無力刊行上下好義  
君子樂助金穀共成勝事者伏以立言垂訓實裨益於  
前修考傳釋經尤有功於後學伏惟環谷先生性資明

敏學問淵源蚤中省闈破天荒於前代晚登史館賜雲  
錦於本朝理學冠於諸儒文聲揚於四海著書數百卷  
昭若發盲立論幾萬言判然解惑顧書肆刊行之未竟  
而學徒鈔錄之尤艱第思獨力以難成惟冀衆擎而易  
舉欲資好善必遂成功謹干學士大夫普及賢豪俊傑  
冀捐金而勸相將繡木以鐫雕大書特書請著此時之  
芳字寡助多助俱留他日之嘉名各發肯心共完勝事  
不日良工會集千年善本流傳天壽斯文與山川而悠

久人介景福界子姓之聰明拱手告間點頭允可謹咨  
今年月日學生汪蔭等咨稟

經禮補逸附錄

謹案卷九第十一頁後一行設筍虞刊本虞訛簠  
今據周禮改

第十二頁前六行卿大夫士之射必先行鄉飲酒  
之禮刊本遺士字今據禮記增

第十三頁後六行率其屬而設筍虞刊本虞訛簠  
今改

第十四頁前二行以弓矢毆烏鳶刊本毆訛歐今  
改

後一行殮五牢刊本殮訛食今據周禮改

後五行車乘有五藪刊本藪訛藪今據周禮改

第十五頁前二行米百筥刊本筥訛以足二字今

據周禮改

前六行鼎簋十有二刊本鼎訛銅今據周禮改

第十六頁前八行子男凡介行人宰史刊本宰訛

牢今據周禮改

後二行膳眡致饗刊本眡訛視今據周禮改


第十九頁前二行致饗餼刊本饗訛饗今改

第二十二頁後一行而冬官則掌邦土刊本土訛  
士今改

附錄第五頁前四行上之春官刊本上訛土今改  
第八頁後四行惟冀衆擎而易舉刊本擎訛輕今  
改







覆校官編修臣查 瑩

校對官檢討臣龔大萬

膳錄舉人臣汪志伊